

寄庵詩文鈔

膝上草序

膝上草者何辟災故宅室少人多有安釜餅處卽無度
筆硯處偶有所吟藏之腹恐其久不復記也乃於膝上
書之潦草不成字體詩亦皆尋常語昔人有於兒背
上畫馬出以易米者此則何所易哉存之姑以志一時之
事正未知名山精舍埽地焚香當在何日耳世有聞者
慎勿以余爲抱膝高吟也道光三年歲在癸未夏四月
在蟾蜍石邊潭西老人時年七十有七

寄巷詩鈔續附卷八 癸未

雲南劉大紳

遊龍潭

春山煥發春水生潭魚出遊林鳥鳴肩輿時來得閒暇
心與元化相合并偶歷險處亦扶杖青石戛擊鏗有聲
鄉人乍見拍手笑耄耋山水猶關情登臨此地不知數
尚記少小從父兄髣髴赤足白嬉戲誰識捫崖題姓名
後來漸能習辭賦未免脫畧嘲公卿即今老矣復何用
披肩短髮空盈盈白口欲哺即歸去惟愁昏黑難入城
再來神祠或信宿松杉影裏看月明

上大魁樓同諸君子

舊是湫隘處遠隔雲霞端層累積不已突兀成鉅觀三
重聳畫棟六面迴雕闌遂覺星辰近斗柄精光爛登臨
五更初雞鳴心所歡萬景夢醒半塵氛未相干清明同
一氣渾然天地寬日出恐事生鐘鼓聲空殘告語同來
人莫畏高樓寒

夢遊山

燈下仙人折簡招青山遠遠水迢迢懸崖倒挂千尋樹
斷澗橫飛百尺橋躑躅荒垣迷古寺低徊短碣識前朝
分明記得吹笙夜嶺上身騎紫鳳驕

哭萬香海

死生隔年月望天空叫呼斯人豈易有吾道一何孤
祿不逮貧士壽惟延腐儒狂名終自遠千載視須臾
如此人長在低昂一世中眼開巖閃電舌動谷生風
笑罵卽逾分傾聽皆不同峩峩高樹幟早已失羣雄
書家西晉後姿媚世相爭棄古必鄰俗求工翻見輕
燒松間怒爆獵兔聽冤鳴留得千鈞腕龍蛇夜亦驚

卧病

卧病亦多幸家居如在山過門人影寂隔戶鳥聲聞
老樹避林立孤雲辭雨還石爐香未歇曼曼竹牀間

食時

歲富雞豚賤年衰食不甘豈真恩及物敢託戒於貪薄
粥同僧慣殘羹對犬慙何時求沆瀣飽飲古仙菴

賦得日入而息

惟天息萬物俾其視日入動作付白晝向晦何汲汲明
月來海嶠平地衆影立甚或繼以燭常苦日不給請思
上古人耕鑿世相習菽水即藥物未假別呼吸春秋度
百歲永無鬼夜泣惟其順天存天札少於邑永言用自
訟庶幾脫拘繫

槐蔭

避炎無夏屋樹木得槐陰縱碍觀書眼能消畏渴心層
層遮午日遠遠接秋林高處聽蟬響一空羣籟音

晚飢

長日原難餓衰年更不禁餅香翁負腹肉臭媼關心馴
犬眠空竈狂鷺叫滿林問鄰餘斗酒入夜且孤斟

故宅

三里城皆壞一重門自開鴉飛高樹上雞伏短牆隈詩
不貴人和花無名種栽招招山谷裏時有白雲來

戲題鬥鶉二首

小鳥無知識依人輒自矜回羣爭勝負未敢鬥蒼鷹

蟋蟀亦微物不忘輸與羸靈禽甘汝肉一啄寂無聲

四月二十七日夜雨至次日

夜中聞雨至無夢有新詩清簟涼承久疎簾響斷遲橫
簷朝鳥倦歸岫午雲疲計月正芒種此來真及時

夢出城

衣笥并書篋都歸舊擔中直行歧路少却顧一城空片
月出樓共孤烟辭樹同尙憐前日大夢呖短垣東

寄李卽園

離騷文士祖矢志處裁知淚下皆如血歌成各自悲千
秋幾後輩五日一先師憶汝招魂祭宛臨湘水湄

四哀兼六別世有此詩不誰握上官尺空登蕭統樓科
名生氣燭壇坫失風流去去番禺境榕陰弔古邱

寄戴古村

蒲艾懸門上騷人怨未休世方悲屈賈君自許巢由治
亂無前史賢愚失舊愁從今齊物我吾亦學莊周

烝餅

不惜薪蒸就竈焚生機鼓動最細紐初聽釜底聲如雨
漸看籠頭氣作雲翁腹空時籩實足兒啼止處餅香聞
一餐未敢忘農力惟念餘甘與衆分

詩

詩是消愁物愁消病轉添歡娛千載共寒瘦一身兼臨
水頻移席看山半卷簾問年將八十踈懶亦何嫌

憶玉案山

俗呼棋盤山

吾母攜孫子長眠玉案山狐鳴宵月裏豹吠暮雲間看
奕枰疑冷銘碑石尙頑夢中時一見全不是歡顏

積雨

深深門巷底積雨長青蛙樓上披蓑重牀前戴笠斜瞻
雲同百里鞭石共千家邀飲東鄰叟無錢典水車

日出疑無雨誰知雨卽來粘天皆濕土奮地少晴雷燕
鵲惜毛羽雞栖憎薜苔蠅蚊偏得意驅去又頻回

貧家無長物，琴劍暮增寒。
缺濕生芝易，絃濡落雁難。
何時橫簾臥前月，捲簾看愁思。
將題句孤撐壁未乾。

先大夫忌日設祭前一日夢自京師初歸覺來猶
依依膝下也

一樹宮花帽上飛，君門拜別向親幃。
分明五十年前事，衣錦新從夢裏歸。

覺來愁聽五更鐘，千仞雲山馬鬣封。
壙底盈盈思子淚，堂前杳杳憶親容。

積雨風寒不住吹，貧官歸久有餘悲。
年年縱得稚牛祭，那似歡承菽水時。

夢張漢渡先生

年少時相見，猶應入夢中。
况經廿載別，又是九旬翁。
氣節立今日，文章存古風。
遙遙一萬里，撰杖未能東。

紀夢

東城有田舍，松挺竹枝遶。
茅茨亂不整，泥壁乾且淨。
中間張蔬筵，歡聯同異姓。
一客辭難留，望影女牆竟。
衆賓繼欲去，挽看月輪正。
庭際清光多，遲行路如鏡。
是時大父在，飲酒未敢嘗。
雙親亦侍側，肅肅起恭敬。
伯兄出後，戶火燃爆竹。
競一以作鼓吹，一以代歌詠。
禮成送客歸，入室燈月映。
忽若將入城，跪稟父母命。
年皆未五十，母

安父則病喜懼須臾間夢覺沒斗炳數年思音容夢一
已爲慶何緣枕席間恍惚遂紛更竊恐常人心久失赤
子性急起視先壟可能宰樹靜

夢後

坐臥小樓陰雨天夢遊亦是散神仙詩囊却怪無人負
腹稿歸來記不全

雨

雨氣連雲氣沈沈入草廬鄰翁稀見面遠道罷傳書暫
作城中客幾同海上居祇應與水鳥踪跡不相疏

晴

忽見雲間日晴生小閣東喧呼來鳥雀笑語走兒童階
石立猶滑徑泥行漸通但愁星月早又是雨濛濛

望登樓山

山作層樓峙近郊占晴占雨勝占爻重重絮帽無輕脫
可是風前怕客嘲諺云樓山帶帽天將雨到

夜雨

窗虛燈燼夜迢迢好夢難成恨未消自是雨聲來不斷
庭前錯悔種芭蕉

憶諸孫

寄跡是孤村清冷及夢魂偶嘗新果餌輒憶小兒孫此

態老人有因思衰母存遠遊貪仕宦倚望幾晨昏

雨間出遊

月大三十日月小二十九天地無他屬但爲雨所有今
雨聯昔雨誰能辨暫久野人趁晴出溪山訪故友望見
風雲色鳥雀趨林藪村落何遙遙滂沱勢甚陡假如天
上遊不向地中走便炙雨工肉兼傾河伯酒汗漫豈不
樂吁嗟行路叟

門前

蠹餘書卷置籐牀村雨初晴日有光鳩婦聲中閒佇立
野風吹送稻花香

憶仙保孫

未到中年與鬼鄰
森森玉樹不逢春
望生毒藥憑方試
臨死哀音對影呻
遺家荒涼偕汝妹
孤魂慘澹侍吾親
晨風暮雨無窮恨
老子詩成少和人

憶女孫

果餌錢分刺綉餘
深閨留買紫金魚
五華一片山頭月
照到窗紗更讀書

夙世不生脂粉家
借兄筆硯學簪花
秋風吹墮珊瑚管
冷落昆明五彩霞

初到西林輒欲回
鳩車竹馬日相催
漸知書味忘歸去

誰捲縹緗入夜臺

玉局峯高撮土稀
薄棺淺葬與心違
游魂且覲花紅洞
吾母歸時汝亦歸

田間

農夫苦力作樂事正不少
雨水盈溝洫纔覺插秧早
青黃旦暮易香飯行可飽
但恐他族滋難教
長莠草荷篠以時芸
無人袖手爪禾長笠盡
隱俯首啄如鳥
儒生眼昏塞詩書
倦精討杖藜田間來
閒看可娛老
香風時一聞
蘭桂同其好
智慧慚世農
竟不辨杭稻
日暮忘賦歸
吟詩抒懷抱
得意昂白頭
膾窄幾傾倒
傾倒亦不惜
田

管有詩金線所
間水清皓衣履罕汗濁兒童莫輕笑猷猷堪優遊此非
長安道

示保保孫

嗟汝不能仙而學仙之懶嗟汝不能狂而學狂之散髮
長日不梳衣垢歲不澣坐臥危樓中積塵几席滿親朋
或來視情意少懇款有時面牆立形影獨相伴腹飢笑
雷鳴口渴恨泉斷春秋迷暑寒晝夜忘長短無罪無糾
彈胡爲自編管男兒知潛脩閉戶事刪繁處士矯干謁
踰垣寓彰瘴是皆希聖賢胸臆匪狂誕否則親師友出
門誼難緩游覽名山川藉以抒憤懣鵬飛翼垂雲鳳噦

聲叶瑄羽族猶且然人靈又何但石粗絕精玉筠曲少
直筍克治貴及早休待勢瘡瘡成仙卽倖致作狂有異
撰尙恐失中道勿爲左右祖

夢萬古厓

村醪獨酌餘華戶掩今雨夢見古厓生著書高尺許

隴上

我欲發嘯撫長松海濤涌出生蛟龍天風浩浩撼樓閣
一聽三日雙耳聾我欲題詩倚脩竹有時和聲如憂玉
生機一片非人爲自顧未免尙鄰俗不如逍遙隴畝間
溝水泔泔鳴佩環稻花香濃午風細笠帽傾仄蓑衣閒

人間第一行樂處巢父許由占有數日斜賦歸不逢人
田家今朝入城去

秋海棠

相思不作並頭蓮斜倚迴闌自黯然愁態全經朝雨後
淚痕多在晚風前託根脉脉望夫石翳葉栖栖怨女蟬
應笑虞兮美人草芳魂一縷舞春烟

重經昨日遇雨處

昨日見路如見虎當道豺狼不足數今日人游即天游
御風凌雲喜欲舞田間從來非畏途一雨一晴今昔殊
竹枝聲送稻花發正恐疾過尋樂無山中晚霞又如綺

杖履定不駮泥滓終嫌老
徒步難汗透重衫濕於水
李載亭將別徘徊月下

如此山間月清光異城闕與君徹夜望未落休言別

水莊花

孤舟渺渺向天涯載去詩家與畫家絕好秋容無客問
海棠花外水莊花

憶登岱

日觀峯頭記昔年東凌滄海渺無邊諸山未敢兄名岳
是處裁能祖上天降雨出雲歸實用泥金檢玉付虛傳
快心一夕秦碑火獨使磨崖萬古全

憶西山懷徐勉齋

岳瀆僭封蒙段間不妨此號太華山縱臨僻壤氣原秀
第到上頭心亦閒文有韓書裁許哭詩無謝句總當刪
若非穉子勤收拾誰引遊人著意攀

懷水仙

縹緲三山望不虛昆華咫尺恨何如夢中一曲移情處
妬殺琴高跨鯉魚

楊柳枝頭露作團芙蓉花畔水成瀾潛居不織水綃買
時有明珠瀉玉盤

貝闕清秋惜娉婷仙家湖上偶揚舲麻姑自與方平見

歸去何曾問蔡經

高樓閒倚月華明
尚記衰翁姓與名
一尺詩筒傳麗句
光輝併照舊茅衡

題奉化輿誦後

怨氣消何處傳來盡頌聲
士於前日信官向此時清
一縣僅能有四鄰齊欲爭
又從皇古後得見小民情

城中山房與鄰舍桂花俱開

片片香雲入戶流
鄰家氣味亦和投
樽前大笑崔司法
却插疏籬棗樹頭

重宿李氏小山房

山房隔城市昔年嘗宿此偶然成小詩呼燈夜中起同
心五六人擊節不能已風雨無惡聲星月射窗紙爾時
歡娛多嬉笑入夢底搖落今何如頽唐鬢老子甚賴諸
少年風流繼蘇李相好無相尤歲月速流水

穫稻遇雨

穫稻常祈十日晴黃雲八月壓隴平天邊忽送傾盆雨
隔斷田間打穀聲

怪得乖龍挾雨來雲端未午早聞雷高田穰稔隨流水
漂泊前川拾不回

十七夜枕上短歌

前宵無月人思月今宵有月月思人人思月思兩相左
雲雨疾病齊傷神上天一心愛下土燥和七寶燭三五
山陬海隅人盡窺斷無盜視目皆瞽固應夜夜如中秋
放出清光上亭樓淒然相對泣蟾兔纖阿失職將誰尤
高歌有人積霧撥小謫無仙巨斧脫姮娥善舞霓袖長
桂樹生香瓊枝活嗟我胡爲甘枕衾於酒不飲詩不吟
雁下鶴飛寂無語悠悠明月知此心

寄卽園

漠漠潭西雁到遲卽園今是賦秋時豈無他處可呼酒
若向別人空說詩暮雨晚風何日共黃花綠竹此心知

水仙正好頻來往僕馬踟躕不許窺

寄古村

華峰翠水亦何奇中有高人幾卷詩便覺山川皆價重
但聞名姓卽情移一杯可惜難終醉萬首常言不少疲
近日吟箋來往寡白雲深處采靈芝

溪西冲試泉歸同魏燕廷

孤村在深山寢食有樓閣世人偶望見詫爲畫中著住
此不輕出衰年省芒屨客譚村外村有泉湧酥酪巨石
列爲几高林覆如幕江東限張陸茗飲臆量度遂同素
心人更試入山脚岸草侵田塍石砭代水約秋風時一

來飄飄笠吹落扶杖兼扶人前行亦未卻試歸逢老農
熟稻正忙穫不往共勤苦詩歌復間作清時此情民尙
欲古仙託

向李乙觀取菊花

不能種菊能看菊我於此事尙不俗陶潛計爲制頽齡
怯慮時并旨酒蓄好詩偶得非強求謝家且輸公一籌
采時南山悠然見曠懷不負東籬幽抑公事業別有在
要看詩中與詩外若第狼籍持酒杯醉臥豈無小兒輩
我視旬尾猶行寓清河天水相經過高才更有廣川子
嫚罵一代人如何當年十日九來往隴西園林結夢想

竹先梅後同逢迎，徑底襟期更適上。
風流雲散心茫然，一身雖存不如前。
扶杖重到舊遊處，雞肥酒熟誰驚筵。
與君共傍井幹坐，波瀾不起泥不涓。
清泉如玉花如金，願從柴桑拾餘唾。
慷慨持贈非虛言，歸思位置開南軒。
今朝借人疾，負擔心逐行路身倚門。

入夜菊花至

衡門倚望屢徘徊，獨對清酒一杯承。
露未兼朝蝶至，棲烟却伴晚鴉來。
新泉緩浸如滋雨，舊土輕移不損苔。
入夜更逢秋月色，好將花影上層臺。

代菊別叢菊

共閱秋風以雲山此去深每因霜勵節更指水盟心別
雁隨長路哀蟬寄短吟早聞無雜客來往瀾園林

代叢菊別菊

苦欲相從去孤根不自移出門秋日暮載道晚霞遲有
客來三徑開筵少一枝遙憐幽興好把燭對吟詩

得菊之次日對花作

田家天晴快收穀老夫自欲乞叢菊杭稻米香飢不啼
采盡落英半空腹肩擔竹藍含笑簪縱橫正如場圃登
路過城頭掩多口背上汗濕衣層層晴種雨移檢蟲蠹
密葉細枝夜防護秋深裁見花開時攀折尙恐小兒誤

籬邊一諾成，千金草木臭。味膠漆，心難將步帳遮夾道。
句尾落日涼，雲陰假如不去，竟遺棄。豈有枝葉能飛至，
蛺蝶歎息蜂啼噓。蘭茝有知亦憔悴，沉江之水何清清。
去年照影梅花明，飄飄晚風送秋色。橋頭一樣寒香生，
祇恐別離恨不少。故山日夕悵飛鳥，忍餓相慰松竹間。
半夜燈青夢魂繞。

題戴占村贈高司寇畫冊

古來幾輩畫人物，兔毫埽殘紙亂拂。雙睛展倦形似無，
擲地不視心鬱鬱。今朝盡篋晴窗開，秋聲樹底靈禽來。
尾長啄短羽毛動，正欲因風出塵埃。一見已喜得生意。

筆墨那有此能事又得一隻清沙汀同是指頭共遊戲
左方鈍物脚抓沙背皮皺紋皺如麻知是吳家斫桂樹
月中墮下金蝦蟆蘿蔔尋常不足數一直一圓可僅取
生噉如梨熟如瓜肉食腥羶爲爾吐只此四幅全逼真
市賣豈惜傾金銀神仙謫來更瀟灑一時驚逢雙玉人
一人手執綠玉杖意氣欲凌六朝上想見應手書就時
呼奴抱鶯笑相向一人口齧黃金卮坐地不語仰天嘻
若非宗之卽太白功名事業如唾遺此兩人焉得一足
夢見侍兒亦不俗丹青寫出原有神人生胡爲自縛束
高家司寇絕代無丹砂的的私印朱草書款識難盡讀

素絲欲繡古狂夫

有兩古狂字題識

昔我見公麻姑相搔背猶

存長爪樣方平橫施空中鞭蔡經先我枉惆悵近年獵
人爲短歌褒鄂動伐將奈何書家酒家尚可卽醉後揮
霍誰禁呵世間收藏更應有安能一一落吾手誰錫此
者如百朋古村戴生吾老友

穫稻畢短歌

水堤漫漫田塍遙留得秋禾没人腰穗垂粒成搖落易
短鎌到處風蕭蕭晴天猶防雨來驟傾盆上擔敢遲迴
較量豐歉顏多歡雞鶩喧呼逐前後小兒今年不啼饑
老妻夜夢添寒衣誰知朝來償工價一擔入市千錢稀

勞歌敢從荷鋤始只此撫膺堪下淚穀賤人愁貴更愁
不如催租作官吏

對菊花

丹黃雜採亦宜秋但對孤芳便可羞草木尙須嚴族類
山林能不慎交游移來翠竹青松畔放出迴廊曲徑頭
他日縱逢搖落後一尊還與共綢繆

水芙蓉

采蓮江上水溶溶一曲歌聲出短腳美女名花今不見
空山自賦水芙蓉

暇日爲屠沽樵漁各一首

望古屠沽肆尋常客不居業卑身近辱道在世多疏一
夕明王夢千秋處士廬長安高第宅相較竟何如
縱橫三萬里處處有溪山空谷餘詩興清歌出水灣漁
樵千古事將相一身閒富貴終何益浮雲自往還

九日前寄李卽園

蕭蕭落木浣江邊獨倚村樓聽暮蟬嶺下牛羊秋雨後
門歸驚鴨晚風前昆明作賦無雙手太華登高又一年
笑我只從平地上狂搔白髮望青天

九日同魏燕廷上村看菊花遂至後山飲松下

不盡登高興同來賦菊花連宵勞夢寐半日慰烟霞秋

水如甘谷春山有貢茶囂囂幽徑底此外幾人家
更入山中去清風杖履多長松眞磊落古冢自嵯峨飲
少輒先醉年高還放歌相逢皆野老一笑問如何

夜吟

詩來推不去倚枕遂高吟未必遽傷命且求先稱心雞
棲猶戀堦鳥宿正依林欲起呼郊鳥空齋夜漏沈

九日後風雨

雲山頗有登高處風雨殊妨采菊秋所幸晴明當昨日
不教躑躅動新愁籬邊晏坐醒原好徑底徐行倦卽休
一自鄉村卜鄰後丹雘白犬共優游

應有

應有人知我今宵夢海門大魚驚怪石孤雁叫荒村行
客聯牀臥居民隔戶喧悲歡無次序燈穗落花繁

聽松

萬木作秋聲孤松起與爭海濤如乍擁山鬼盡相驚危
坐石邊人幽懷雲外清向來聞洗耳得此足平生

看竹

聽罷前溪雨風烟不盡時秋天同一望夜月共相思樹
密編門入人多舉座移是中居自好千戶又何知

玉案山墓祭

兩年才一祭，何以使心安。
幸免牛羊踐，全無草木殘。
山高斜日速，樹大晚風寒。
不易重來到，徘徊欲去難。

晤葉約軒

欲見卽相見，袖中詩卷多。
儲王惟雜興，李杜自悲歌。
與客臨秋水，看農刈晚禾。
前溪橋影斷，行路悵如何。

宿卽園

舊夢屢遊此，今宵仍夢遊。
鶴鳴知夜半，雁唳警殘秋。
海外三山遠，城隅一室幽。
牀前皆積水，片月在高樓。

曉起對鶴

天曉厭遲起，終難居鶴先。
不知籠底夢，可憶海中仙。
徐

咏菊花畔長鳴梅樹邊
詰朝偕我去山柴共高眠

至卽園喜晤老友并古村嶰谷古村先成長歌遂

繼聲焉

雨師風伯據長路
山橫蠻烟谷瘴霧
霏微不已成滂沱
泥塗十步九回顧
老夫况非少壯日
春秋又復警霜露
盜賊鬼魅久相凌
官塘野堠早神注
贈詩姑且山靈要
投扇無妨水神賂
松柏蒼烏鴉飛兩
年一臨母氏墓
孫子孫女侍歡否
且喜邱隴尙安固
祭畢便望西城闕
卽園花木正如故
入門更添鶴數隻
趾綵頂丹羽毛素
故人執手翻涕垂
語言錯雜恐謬誤
雲散風流重會合

金石諸友非夢遇太華峰頭昆水瀕龍虎羽節齊奔赴
鸞鳳蛟鼉競馳逐瑞日彩霞四周護翠海知心水底仙
戲騎鯉魚慰寐寤性情共向勝地真詞賦兼來良朋助
豈似村居少儔侶胡爲首倡竟無句金馬碧雞應一笑
往日豪興消何處古村奇才副曠懷一家機杼今有數
幾回讀罷空搔髮巧繡那得金鍼度歡筵卽作籬筵看
更爲長歌送歸去

題李卽園種梅圖

是何垣星散爲李隴西蟠根數千里細枝蔭及諸侯王
大幹毓作唐天子富貴功名旣希有更有文章世濟美

太白天仙長吉鬼茶陵北地續而起百千萬年歷乾坤
要與詩運相終始清時光昌不乏人秀鐘昆華及蒼珥
羞同桃花競爛漫並列私家門牆底倏然種梅三百株
香雪飛花藐紅紫馴養海鶴四五隻圍坐中間理綠綺
遠追孤山建高標近浥龍泉漱清泚攜兒奉母行樂間
大婦小婦進甘旨歲久尙恐園林蕪壽以丹青守以紙
恨無四李神來遊自作長歌歎觀止我展卷讀忽大笑
元元皇帝册李耳當日道德遺世家胡不黃老載本紀
博大真人同關尹只合列傳傳舊史寄語後來秉筆人
好將文苑置吾子

紀卽園女兒割股事

李子詩學宗正始脩齊深得二南理有女及笄以孝聞
形容難將變風擬李子抱病今年春藥物不靈醫不神
杯羹潛和左股肉剝然起死爲生人深閨秘不向人語
暗裏創痕腕徐舉踰時內外皆喧傳刀圭何必勝鼎俎
遙想夜半霜刃橫親身可贖兒身輕遲回顧慮一無有
全從至性鍾至情乃知奇行出女子心迹日星炳圖史
南陔白華惟有聲以此補之得所止却怪李子深於詩
胡不大放瓊琚詞令天雨粟鬼夜哭荒經如我將安爲
我有父母今已杳當年何曾一嚮飽大忠大孝皆愚成

男兒壞事由智巧長歌短歌聲悲哀耳聞尙欲肝腸摧
若見快刀下手處血光飛濺顏如灰

戴古村采藥圖

醫人公醫已私公私之間誰復知醫身小醫世大絜量
大小分殿最萬仞山中靈藥多五色芝上彩雲會鐵鑊
木柄託爲命鹿瓜無聲鶴影靜有時狂歌巖壑應筠籠
載歸山月正古村笑謂我朝搜夕訪不嫌瑣金鼎玉爐
調水火刀圭入口盡帖妥木妖石怪難爲禍我笑謂古
村虎喉蛇腹醫皆可以此醫人尙恐左面目雖平心實
頗安能福壽及么麼我知此事君寄耳作圖寄中又寄

矣不如且狎漁樵翁但坐高山聽流水

答楊鳳池

八月君思我九月我思君君詩我已讀我歌君未聞卽
今湖心亭我亦未一到不如前年秋良朋共嘯傲良朋
如形影亦復如夢覺形影不相離夢覺各分造學仙是
妙悟願得神丹成排雲駕鸞鶴頃刻飛蓬瀛相思卽高
會離別聽人悲千年不暫死鬼神空爾爲

憶鶴

作客得雙鶴賦歸行不孤却愁辭好友未卽共長途渺
渺寄琴操遲遲成畫圖游仙頻有夢騎汝上蓬壺

又七言律一首

孤負昆蕪寵贈時秋風一擔上肩遲平生萬事易消遣
此際雙禽難別離於載石餘成獨好向懷人後益相思
梅花計日開晴雪嘉客能來賴爾知

寄高用康

更有六人無何時忘寶珠荒山泉響亂遠寺月痕孤我
自憐才子誰能笑腐儒微茫風雨夜鴻雁尙相呼

寄馬子雲

雪山近處結吟廬日飲瓊漿幾玉壺不識長卿消渴甚
荒林落葉著何書

空山烟雨擁蓑衣牛背兒童向晚歸短笛數聲吹入耳
思君一曲鶴南飛

病中憶東臯舊遊

因病長思廿載前沈疴高臥大河邊新交舊友饋參朮
月夕花晨聽管絃自幸罷官爲上客都言廢令似神仙
於今少壯人存幾縱使重遊已黯然

賦割股詩竟念卽園不置

昨日屬賦割股詩驚歎孝女行事奇竟忘吾友遇屯蹇
無此幾至身傾危丈夫以司文章命百歲手持造化柄
猶以二豎輕相嘗是何鬼神氣殊橫我輩離合爲悲歡

況於疾苦摧心肝君病縱無人告語亦應有夢來相看
既聞回生得人肉可知許多費參茯尙不細訛何因由
頑冥毋乃如草木病中思及裁自尤一宵風雨天悠悠
終憐孝女世間少誰人紀事傳千秋

秀山僧索書檢舊遊詩已久刪去漫成長句

絕秀林巒昔浪遊曾無一字卷中收每當好夢枕邊遇
便似仙山波上浮幸不封塵勞妓拂何緣落紙應僧求
茶花卽傍梅花發鶴鷺重將醉倚樓

題畫

山有樵人水有漁林間結屋自閑居遠天送盡飛帆影

坐聽鐘聲梵唄初

小橋梅樹爲人摧折賦詩弔之

何時何人種梅樹經見七十有七度徘徊小橋流水間
除夕賦詩正無數凌冬最愛枝高寒烟雨迷離蛟螭蟠
寫入圖中尙愁折要留萬古高人看屠沽誰家溼薪缺
長刀巨斧砍冰雪自欲爛熟羶羊頭不管空山臥明月
道旁過客猶吁嗟停鞭落日聽蹄鴉況是相思如我輩
竹外今少枝橫斜小橋自此聲價減半坡樹底亦色黯
明知無情人甚多恨不移根傍軒檻去年龍泉弔開元
浣江又招枯樹魂老人墮盡傷心淚新詩空附舊詩存

讀卽園辛巳送行詩草堂梅花正開賦寄

思君讀君送行詩又於梅樹添相思能抱冬心憔悴死
君與梅外還餘誰思梅見梅梅無二草堂卽園皆樂地
思君不往便須來無故見君大不易君卽過我潭西前
不日驪歌唱離筵猶我三宵卽園宿今日依舊愁雲烟
尋常樂事世多有最難山林及朋友安得與君與梅花
并爲一身無前後

寄楊嶠谷

思君如梅花空山美人家雪晴月明時相見何至冷落
悲天涯兩載昆華悵離別匆匆秋風對落葉關山一片

塞幘聲又向長途訴鳴咽轉羨前年武侯祠送行正是
花開時高攀低折勝楊柳歸鞍滿插冰雪枝潭西香風
今亦有大小雅材不常耦思君那得如梅花苦吟空白
垂白首

寄戴古村即同雞字韻

日月壺中望欲迷幽懷祇合住潭西有時受籙佩長劍
多事尋詩扶短藜未得忘情如野鷗忽驚破夢正鄰雞
羨君采偏神山藥玉杵霜前手自攜

梅花二首

桑榆零落野人家長閉柴門日易斜歲暮風流輕一世

牆頭屋角盡梅花

瑤林琪樹絕難攀
種得梅花身自閒
一擔更挑雙鶴至
荒村卽是小孤山
時卽園贈雙鶴尙未載回

詩之有大家也蓋合一世之詩人以爲言且合千古之
詩人以爲言也後世乃有於一時一隅之間而品隲之
誤矣夫所謂大家者其人必胸次廣大性情敦厚識見
高遠才力卓越而其運會所值境遇所遭又足以成就
之而使之軼絕乎羣倫範圍乎百代如唐之有李杜宋
之有蘇陸元之有虞明之有李何 國朝之有朱王是
已 是皆天地山川積數十百年之精華靈秀始鍾之於
是人而氣力已竭遂不復他有所屬又欲俟之於數十
百年後者非偶然之事也然謂非大家卽不足爲詩也
又豈通論哉余嘗謂禹之治水稷之教稼契之明倫舜

之典刑周公之制禮作樂孔孟之言仁說義贊化育參
天地大矣至矣弗可上矣而如奕射書算謳歌諧謔片
長薄技無關大道苟能得之天而盡乎人皆足造其極
以名於世夫詩亦猶是也今甲申七月六日將立秋歲
去其半矣偶檢詠草有所觸因書於篇首顧念余此稊
中所言事不越農圃外情不出草木間憂愁勞悴幾難
名狀蓋其境愈狹而志愈小矣溝渠間有微蟲焉體圓
質黑四足兩翼羣聚而嬉縱橫交錯如人作草書狀甚
自適也見鰭鱗卽駭然紛散况敢至於鯨鯢之前余今
年詩不幸類是嗚呼是尙可以爲詩乎哉是尙可以論

詩乎哉潭西老人劉大紳

寄菴詩鈔續附卷九

甲申

雲南劉大紳

華蓋山看梅花

仙靈窟宅舊無塵，重賦梅花歲又新。
樹到老時裁出衆，枝從高處輒先春。
似誰峭瘦祇餘骨，如此蕭疎自有神。
願與鍊師勤護惜，莫將巨斧屬樵人。

燕子歸

紅杏飄簾幙，堂深綠柳遮重門。
歸燕子，隔院放桃花，舊社如新社。
君家是我家，年年春色早，莫自怨天涯。

桃花

東風醉倒酒壚邊盡怪衰翁似少年絕好春情難捨處
清晨雨後夕陽前

憶龍洞山口桃花

酒熟雞肥記曩時仙源洞口賦歸遲桃花若是鍾情物
不許春風樹底吹

是何大力負藏舟聲氣詞華一旦休月夜唱詩非惡鬼
梨花一樹上墳頭

憶有衡孫

我讀衡山畫微茫不可求呼孫聊想像得句最風流二
老相逢處雙松古渡頭

有衡語

吾家誰復有中夜恨悠悠

煮豆

熟在甍前種稻餘青青
莢裏貫珠如炊烟一縷
垂楊岸瓦釜香生二月初

溪邊列坐櫬青苔手擘何須借箸來
旅食北方難得此白花原是向南開

小園看花四首

已栽彭澤先生柳又種東陵處士瓜
更引短繩牽破甕清泉汲灌滿園花

傍沼依籬頃刻開脫眉人自甕中來
花神不語心相笑羯鼓祇應向汝催

從容小閣獨吟詩呼取鄰翁半醉時未必相公名刺貴
真堪魏野重茅茨

特地山林置老夫竹聲寂寂肉聲無自然併在絲聲外
繪出桃花流水圖

題戴古村近詩後

徙宅孤村中寂如萬山裏雲烟謝車馬冠裳避疏水計
數兩年間曾無幾人至題壁斯新詠署楹重故紙遠遊
憶曩昔海岱既萬里昆水與華山亦復非尺咫曠遠雅
頌經荒踈風騷理竹月空餘光松風枉四起兀然寐還
醒嗒焉行且止自信不諧俗絕物咎由已欲向九天上

星斗問奇字又往三山間神仙證逸史飛騰少羽翮挾
持仗藥餌昨暮方盤飧杳杳雁與鯉忽然六丁甲馳送
雲霞壓光遠耀林壑鬼魅驚逃徙展讀十五日寢食弗
能已平生交李戴高岑孟賈比卽園詩未封古村冊在
几媿妮善言情誼氣繫生死每到淒絕處淚痕漬杖履
直將甫哀并何但衡愁擬要之精神通哭笑皆有以村
花及村鳥相對具色喜其知山中人得友天下士一年
寄一集循環甲乙紀著作君等身贊揚我屈指閉戶輒
高歌出門或深鄙悠悠大道旁趨走慕羶蟻

寄李卽園

暫息交遊強自寬
山深二月怯春寒
丹鉛時校舊書卷
烟雨偶移新竹竿
酒熟偏從良夜禁
詩成那得故人彈
聞君亦謝門前客
野鶴閑雲只獨看

村居

覆地青莎雜綠苔
土牆瓦屋隱蒿萊
春風始許癡人住
暇日長望好友來
竹解生孫有實用
花能結子不空開
蟠桃却在瑤池上
偷食雄心早已灰

野遊

出遊何處不看花
芳草芊綿日未斜
竹杖扶從春水岸
蓑衣披向野人家
瓦盆酌酒橫魚鱗
土壁題詩結蚓蛇

狂態偏生微醉後欲因白鳳借仙車

草堂

名襲潭西舊人云第二堂十年前有此萬里外難忘蜃
粉落空屋蝸涎留短牆新圖須好手卽擬寄詩章

行籬落間

蔓引藤牽處春陰一逕斜圍牆原代石繞屋竟開花虎
豹愁難入塵埃喜易遮朝烟留得住向晚散成霞

老

豈不惜年少西山紅日斜一詩裁起草兩眼已生花自
信無佳趣人言是作家鄉村閑適處漠漠噪昏鴉

開行

山外漫相招山中不寂寥牛溝春水活一徑野花驕得句先題石尋詩又過橋時聞歌四起倡和有漁樵

楊丹山寄書並奉化諸暨兩縣留別詩至喜其政

治之成也感而賦詩不寄丹山也

穩臥斯民枕席安封書寄到笑相看共知我輩從心易獨惜人前俯首難事業三公歸有命經綸七品是何官攀轅臥轍十年後回首悠悠雙鬢殘

抱君詩卷日沈沈不覺相思海岱深竟向青山成白首尚憐黑夜卻黃金一朝循吏無他術千古愚民共此心

遺棄嬰兒皆長大生祠

水三集卷六

清明

水抱孤村山抱樓身如農圃歲優游
每隔竹垣聞叱牛無用正宜栽散木忘情
今朝忽觸清明節上冢淒然淚暗流

抱甕行

瓦甕瓦甕爾何拙不能如神龍背上擎天瓢
雨不絕不能如素練百丈繫銀瓶笑人戲弄相歡悅其
頸縮然腹餒然注升斗水多卽泄洪河九曲失江淮
渠一濤遍畛畷魏陶只爲井邊設兢兢懷抱悞大耋

巧少年棄不屑日出日入無多時春去秋來亦一瞥忍饑
受餓年復年偃僂循牆更蹙躓喝不及解人熱旱不及
補地裂衆芳生歇付鷓鴣與東空手何分別桔槔在旁
日哽咽語汝不聞歛截子

催花吟

東家小妹年十五霞帔雲裾辭阿母西家少姨年十六
寵如阿嬌貯金屋英雄得志須及早兒女多情亦嫌老
君不見潭西草堂牡丹花三月春深纔發芽天桃穠李
怨風雨我有新詠題誰家

賞芍藥花作

天漿時與醉仙顏自許
瑤宮第一班却爲草堂人寂莫
自騎綠鳳到春山

長笑園丁著意忙承筐
負擔自輸將萬花會裏誰爲王
不及昌黎是楚狂

夕月朦朧入夜寒花枝
欲睡我猶看曉來不識曾醒未
又傍春烟繞曲闌

放酒長歌憶昔年偶然得句亦如仙
老來才盡江郎夢
殘顏猶揮五色箋

檢鄧壽之畫蜻蜓有李卽園題詩

冷落寒潭一釣絲少陵不作更無詩
鄧生著色李生賦

只此蜻蜓人尙知

筆頭沈池中取出志喜

臨池暫作臥龍觀滿紙雲烟倦不看欲寫熙朝霖雨頌
一朝汲引出泥蟠

鳴鳩行

鳴鳩有子背母去孤雛相依處危處搖風漂雨巢欲傾
身經百憂復千慮同類得氣化爲鷹乘凶聚族相欺陵
一時自矜利嘴爪不念已老雛亦小

石珊瑚歌

三代鼎彝不出土秦壁楚珩僞作古漳瓦拾自銅雀臺

蠹簪擲從諸葛鼓博物君子咸收弄好事文人亦誇詡
飢難充腹寒難衣眞贗無從攷圖譜近來黨蔘說柴定
質薄材脆不足數趨下乃及宣德銅綠暈赤班駭童豎
白金千兩錢萬貫術操奇贏在大賈權門尙欲罪匹夫
無用物爲禍福主獨憐貧士識時務有耳如聾目如瞽
同時不復稽藏行隔世何曾問散聚得難如玉任沉沒
歲久化塵聽官府人各有寶惟不貪性豈無好在能取
山中歷賢常落落石際獨行自踽踽挾沙劇礫揮長鉏
跨壑登巖試巨斧初見形模介疑似恐將瑾瑜誤珉珉
旋憑鑒識中棄珍勝校圭璋與琮琥剔外搜分盪磨屢

拋粗求精礪碯苦賦形混沌原有真制作神明豈無祖
剪能大小慎取舍自然方圓就規矩上偕俎豆陳廟堂
次作餅壘置園圃老夫所寶廿餘載小器偏覺用最溥
洗墨無庸地鑿池插枝不待天施雨花開英多卽文繡
詩成氣盛肖龍虎什襲暫藏還欲看斯須不用若無睹
此物誰作復誰述今有魏野里人魏君嘉賓昨陸羽昆明陸君振鴻人
前自矜心不慚暗中鬼視舌盡吐未辭腴胝見手足直
教怪奇出朽腐吾兒近亦能爲之更千百年不苦窳

夏旱灌花

旱歲作威如虎虓桔槔人盡向東郊願分片晌農家苦

不敢銅餅掛樹梢

灌花亦似灌禾勞
炎背炎炎夏日高
未午息陰松樹下
長風海外送秋濤

杜鵑行

昨夜哀號口流血
月上三更尙鳴咽
今日村落雞未啼
又向山頭叫不絕
是名杜鵑卽杜宇
一云秣歸與鷓鴣
當年尊爲蜀天子
錦江玉壘得聖哲
巢居猶自思故宮
毛質雖殊性未滅
淚染花開紅躑躅
巖婦夔女手爭折
萋愛映山顏色鮮
豈知望帝肺肝裂
却訝年深事已往
寸心何至尙如結
傳言歲旱鳴常悲
恐餓死人無處說

多人不與羣，黎關萬古偏勞一禽切。苦鳥二字聽了了，
不如歸去待分別。茫茫下土聞之不九重，帝閭想已徹。
爲呼神龍起淵底，攜雲提雨遍畛畷。二苗在野鵲歸山，
我亦安居卷柔舌。

脚癢

少壯游覽時，談笑卻風雨。老厭登山脚，反被山鬼怒。閉
門日靜坐，陰晴痛右股。左股幸無虞，獨立莫予侮。

後石珊瑚歌

海底珊瑚長十丈，海客沈沈出鐵網。玩好雖在耳目前，
幾人日將魚腹葬。山中珊瑚稱最奇，中空糾結杈枒枝。

沙泥悞人尋不見重重包裹龍虎皮有時獲之卽重寶
日漸月摩臻精好餉還自是天地心牲璧何須鬼神禱
春花艷發秋月明端巖石露鸛鶴晴中山兔毫剡溪紙
振袖揮霍癡書生滴淚曾否玉蟾蜍怒猊渴驥堪自娛
鐵刻意敢輕相試第恐擊缺銀唾壺古來才人棄草野
不用乃在珊瑚下作歌歌罷長吁嗟斗閒精氣識者寡
不能飲酒吟

不讀周書不禁酒酒價三錢得一斗稱瑞轉是長醒人
市上千百始一有老夫不幸今如斯罵坐追憶年少時
豪興消磨歸何處避客日誦陶潛詩倘能酒星摘天上

置腹須臾飲無量
伶仃不聽婦人言
阮藉嵇康弟兄行
便欲徙宅居酒泉
大瓢小杓相周旋
丹沙不乞勾漏令
一日一醉輕神仙
嗚呼此境若再得
落齒重生白髮黑
酒星隕石酒泉遙
且傍酒人看醉色

不能作詩吟

不痛飲豈能高歌風騷
奈爾枯腸何興來一醉一百斗
胸中泰岱森巖峩吐出口中雲
五色傾向紙上海水黑
雷霆奮怒蛟龍飛下土
囁嚅讀不得笑我密友今絕交
張耳陳餘難解嘲不憑春江變
春酒雲漢天章失吾手
君不見唐家詩豪李青蓮
不言飲酒卽言仙陶公無酒

攢眉去蓮社未題詩一篇

小石珊瑚歌

厥體微方廣寸七厥崇三分殺其一厥腹洞然口豁然
注水清瑩玉壺匹日用其半百年在歲旱不乾澇不溢
大腹之甕長頸瞿非不龐然負所出土泥參和異金石
墮地瓦碎少人恤人物焉能無毀全嗜好自是有得失
乾精坤蘊賦性情神巧鬼工成形質得之維艱視之重
非人一見尙難必在天願入文昌府在地願藏二酉室
天長地久無盡時懷瑾握瑜日復日

雨 四月十九日

羣山忽出千里雲四野齊呼半尺雨
第得綿綿長不絕
田家餓死不言苦
多日烈日禾苗枯
一溝水邊百農聚
喜親怒詈言無擇
淚下難濕久乾土
誰聞婦女歌竹枝
不見兒童擊秧鼓
老夫亦爲荒園勞
清晨抱甕到日午
綆短泥深鰲鮓侮
古人灌園自高隱
草木焦黃亦難睹
若使一物不相關
虛生於世究何補
倏然風雲幸際會
拔劍起從酒後舞
舞劍不足還高歌
餘酒更呼老農圃

竹

萬物皆喜生
竹生胡若怒
要與癡龍蛇
終宵戰風雨

再寄卽園

久不得消息知從何處遊采芝神嶽秀試茗古泉幽科
目遲名士詩文重選樓中華題詠徧海舶遠相求

竹

一出凌青霄當風喜欲舞延緣平地生衆草爾何取

風風

夏雲不作雨苦畏日恒曬洞然開南扉向北有餘地左
右生新竹踈簾巧位置雙股橫其間薄暮微風至由背
達心腹無聲有涼意是羲皇上人陶公語不易水亭鼓
大扇妖姬更迭侍疾徐斷續間未必如指示風人風何
德蒼蠅亦遠避清吟待故人遙望難致家釀喜初熟

一杯且獨醉

廿有九日又雨次日作歌

四月十有九日雨井邑歡呼及農圃廿有九日又雨之行旅歌謠徧道路上天爲德何大哉十日一雨如期來南方貧民種瘠土猶自苦旱望雲雷病夫起牀荷鋤立爭要泥水決溝入厠雜言語同心求禾苗不乾笠蓑濕一家田間有一天天漏莫補望豐年今日清晨盼到午有雨無雨心茫然

次日又雨

桔槔辭野老轆轤謝閔丁道上水皆滿田間禾盡青倦

猶犁外看病尙枕邊聽白鷺羣飛處無錢構一亭

雨中作

田水旣盈溢井水亦全涸力田復汲井飢渴可無恐雨
與不雨間憂喜若接踵顧念此生平豈惟飲食重年歲
雖已邁進修正宜勇嚆志緣悠悠輟行爲匆匆多少同
學翁墓木半已拱冰淵日三復易簣神尙竦不負天所
憐敢負天所寵

大樹行

長日炎炎避無處村墟中間有大樹先秋颯颯清風來
偶坐如與故人遇高圍丈尺粹難量邱壠室廬廕其旁

快斧利斤，何事烟雲慘澹。心茫茫，半天忽見雷霆走平地。長聞鬼神守棟梁，大匠不與知薪蒸。小兒誰敢有若使此樹全無靈，十畝難庇一條幹。青我輩，壺尊極得意。行人鳥雀誰能聽，問訊手種何年始。孫枝凌霄勢不止，老人云爲兒童時。父祖相傳早如此，從今壽汝千百年。下辭螻蟻上烏鳶，更與黃鶴日來往。待聽清唳高樓邊。

夏日

近郊多嘉樹，連村少惡木。結廬居其間，好鳥共鳴宿。春風旣紛披，夏雨復膏沐。材用在他日，綠茂早怡目。飽食身無事，殘書手把讀。有時命杖履，樹陰自往復。何必逢

外人吾以適吾獨

白日歌

白日西去一何速
纔聽雞鳴又炳燭
魯陽長戈不借揮
杖策羞同夸父逐
老病積書尚滿屋
時時把就餘光讀
得味勝似兒童時
可惜記誦難經宿
溪山佳處姑盤桓
山鳥猶啼花未殘
路逢外人又輕笑
被身衣長腰帶寬
欲從神仙求大丹
蓬萊海上多波瀾
幾人襦袷經白首
顧影如何能不歡

拾蝶

一食療朝飢
緩步竹垣外
蔓絲何糾纏
蝶夢醒無奈
拾

歸養雙翅俟其車輪大羅浮風雨間仙侶日相會

見病者

不巾復不襪逍遙堂室間此心豈不樂門外多痼癩癯
狂失正性愁苦無歡顏雖非我子孫何能漠不關游鱗
共依水走獸同在山羣彙盡咸若四靈斯無患安得良
醫功直與名相班

蠅

小樓門扇朝慵開青蠅竟從何處來羣飛疑如赴前約
先進又似防後推變移黑白汝長技黠汗墻垣猶細事
最嫌集硯橫臺端惱亂書家不得意王霸雄略捫虱譚

將相奇緣夢蟻酣無端溷人成何物蚊芒蠱毒同不堪
此間清貧莫火據扇底涼風我能御腥羶氣味屠門多
汝若有知入城去

蠅蚊

夜避飛蚊晝避蠅之二蟲者何類仍猶幸一出一潛伏
尙不并力相侵陵莽操懿溫古殘賊人生其間無顏色
前蹲猛虎後蟠蛇咫尺道路行不得

閒行

百物承夏假形神盡條暢野人心無營邱園自閒放平
生恥捷足徐行藉鳩杖扶老如兒孫不形衰態狀蜻蜓

有翼足悠然立其上顧之始飛去竹際微風颺詠詩愧
杜甫何以相和唱卽此欣所適亦足寫屏障

望雨

昨雨猛如注夜半到清早低田承水多及時揮禾稻高
田無所得長愁秧節老今茲又十日荷鋤待行潦
亦紛紛赤日終皓皓恐併低田中青苗且就穡小人農
圃餘荒園抒懷抱一籌尙莫展况爲萬姓禱傍午開北
牕涼風透夾襖風來雨不來雖好敢言好天澤非不施
人情正懊惱箕畢各有好不如絳河倒日日傾甘霖家
家稼穡寶四海慶豐年一園何足道

盜伐小橋梅花樹

是何洪鑪鑄長斧七日炎炎虐焰吐太乙有靈不下觀
魑魅魍魎立如堵及鋒塗以礪鷄膏斬伐勢如快風雨
純鈎湛盧曷足數不成荆棘賦梅樹一時詩人齊鳴鼓
老夫落落少知己解賦梅花歲庚午於今已及十五年
恨不移栽近堂廡此梅生成本得地辭盡川原沃壤土
獨在小橋流水間顧影誰人妒眉斌我輩氣味直相若
一瞬百年作賓主驢背鶴籠深相思况復孤村結茅宇
彼哉與梅爲怨府鑄錯幾州生鐵聚轉恨十有五年前
烟雲迷離浣江潯去年摧折橫斜枝不情猶或恕牧豎

今年根柢且盡伐圖形繪影亦何補誦詩急與投裂虎
誦詩不足且特書聞者慎無笑余僞

又

歲在甲申夏五月小橋梅花爲盜伐丘筆書師良史臣
例從赴告日亦闕此物歲久森叔枿竈突那得薪一車
縱能黃金鑄形似香風難上枝頭花川觀巖居逸民比
長恐辱身復降志竟同要路妨賢豪置之死地纔快意
東山有石名丈人前年戊午會哭傷我神今年又爲梅
花哭蒐招不來浣江濱鳩夷汎汎五湖去鴻飛冥冥戈
何慕風雨淒淒月茫茫可憐山石與江樹

又

有夢不離江上路有花不著橋邊樹流水無情自東去
何嘗少微隕今年斧柯在手天無權謂我子實使之然
人皆喧闐馳車馬子獨岑寂肆風雅倚樹據石太瀟灑
萼府不畏霜雪侵根株可耐鉏耰尋一聲樵唱來烟林
寒氣感理或有紅岩蒼藤尙在否我曾從之日飲酒
又

杜鵑聲停口無血瑤臺仙子言未別浣江橋南橫小橋
獨脚跳躑來仙魑百年老樹留不住十丈玉龍蛻骨去
澗水泠泠山月冷長想美人自照影小園修筠滿山麓

淚染化作湘江竹

又

憶昔野燒四山起十尋大木盡焦死烈焰射江江水紅
神鴉未到小橋止一朝炊烟飛灶門燧人饗人分怨思
何時神霄吏傳語帝遣巫陽下招魂

先大夫忌日設祭

終身憂此日奉饌更長吁菽水生嘗厭椎牛祭尙無如
存過百歲旣死剩諸孤衰老仍貧賤先疇望歆燕

蚊

物猛爲豺虎物毒爲蛇虺憎人不類已快意相摧墮如

蚊細已甚羣飛聲若雷暗從暮夜至私幸帷幙開揮扇
驅之去方去旋卽來志徒得一飽身穢心未灰微蟲無
知識冒進眞可哀高枕且安寢擾擾何爲哉

星回節有感

夷地天不鑿夷人性不虧綱常或傾覆婦女爭扶持食
生味慘澹舉火烟迷離旣死千百年憑弔如當時聞
有巾幗丈夫空鬚眉阿南及慈善漢唐得女師皆非中
華產正氣鍾南夷千山松已禿兩婦名猶馳習久成介
節第供人游嬉老翁忘舊事跳躑任小兒新夫羹枕歡
故夫邱壠悲火窮無薪傳感此多哀思

化虎行

吾州地褊小無高山大川豺狼失巨穴蛟蜃逃深淵物
我得安堵生養千百年有人竊氣機化虎皮毛全始猶
食犬豕漸且及牲牷後遂不擇人忘疎親愚賢阿母與
阿兄目怒心忿恨且喜愛其兒舌舐口垂涎厥妃亦不
免何曾知性天出入祇一身惡影相周旋行客避道路
村落稀人烟羣生訴麒麟麒麟心惻然急命猿若猱召
戒難姑延巖壑匿不出訓誨無由宣騶虞亦歎息長惡
終不悛元罪顧而笑烏鴉噪於前疑似石猶射放恣人
誰憐獵師密網罟壯士鈇矛鋌閉距兩無策晴閃肢拘

攀爪牙盡委地咆哮徒震天亡威狐不假失勢張何權
肉燥強吞燕皮溫甘寢眠回思未化日冠蓋殊駢闐肆
燒幾時刻遺臭長留傳經過曩行處日暖風和妍胡不
仍爲人恭讓泯尤愆

遣遇

小園廢地老學種花晴春雨夏生意索然詠情
何有自遣無由遠憐賢豪近愧奴隸

上天仁愛心不遺一小草時至精英多無物歎枯槁厚
地亦善承蕃釐稱富媼人生藐七尺身偏隔洪造敢
言四海大推恩足以保尋常離落間愁思且燥燥本欲
藉風月閒情暫娛老滿園少生意轉致取煩惱慚媿鄰

家兒爛漫春風早春風豈有私我實未知道天象忘陰
晴地勢昧濕燥師心或自用智勇尙困倒奔走勞童稚
圖經徧參攷甚欲求神丹遠向蓬萊島古昔稱花師萬
倍得珍寶彼技何有他斟酌適旱潦池館牛光輝退休
散風抱我非拔葵翁卽目厭蓬葆緬懷園不窺曾次日
浩浩何必詩酒徒沈酣費辭藻人代易速朽百物豈常
好唐宮及宋苑繁華跡已掃荒臺擁荆棘廢陂長禾稻
空聞歌舞人眉青齒復皓

積雨中得戴古村楊鳳池寄書與詩又得朱麗川

書又前日得馬子雲書因賦此

最樂是朋友不奈易離別昔恨山川阻今復嗟髯鬢欲
往不可卽欲止心難輟憐人是魚雁力與舟車埒數函
寄到處灑落解中結道路空險艱鬼神枉拘掣見書如
見面肝膽一齊熱况又風雅詩與古作者列平澹本怪
變汪洋歸高潔藏之千百年一字豈磨滅荒村門巷聯
積雨履聲絕今晨幾尺素愁苦易歡悅愁壘歡卽肥鏡
光照如雪向晚加餐飯不用祝哽噎

和古村

尺牘如面譚古人言不欺吾子進一解愛是宵夢奇我
固慣說夢語人人笑癡君夢我或無我夢君豈知同牀

尚各夢難得同夢時夢覺視天地萬古同一悲幸有雙鯉魚遠慰長相思

寄李卽園

賦別是何日得無經十年再思原不爾萬恨却相牽夢繞迴風鶴詩懷捉月仙謂水清宵同悵望杳杳隔雲烟

相思吟

相思不相見少年且易老况是衰朽人形容久枯槁出門視天地中心杵臼擣山川要風雨并力相嫉媚太上能忘情此語亦强造乾坤苟如此萬彙去懷抱湍水投長竿疾風樹大轟凝然無動搖鬼神不受禱因念我與

我百年最相好不聞說相思由無別離惱心同身不同
夢魂自顛倒第恨相思遲誰悔相思早千古有情人原
殊木與草作詩待我友精義更探討

晚上西山頭

晚上西山頭老眼望四野斜日猶欲明大雨又將瀉白
年幾陰晴萬古此鑪冶前人既已往誰是後來者昆華
與蒼洱杳杳白雲下衡宇仿佛間况乃接風雅出游卜
吉日顧盼據鞍馬臨行恐復休少壯固難假

七夕愁雨

匆匆一夜響凌晨暫停住牀頭坐不寐難爲喜雨賦日

出熱於火其知卽將雨又向飛檐端高笠聽瀑布寢室
與書廬相去十餘步泥深竹徑滑苔蘚碍屣履自從夏
至日望晴目爲瞀未卜立秋後可乾白石路猛思今七
夕恐漲銀河渡填橋勞烏鵲佳期未許悞銀樓視牛女
乞巧尙有句拜謝浮空雲漸次歛遲暮

出門

衡門久不出田中稻花吐香細時涼聞清與碧蕙伍根
下草薶淨氣力受全土町畦插荆棘踐踏禁犢毀相逢
少閒人勤勞是田父芒芒各自去驚飛白鷺羽犬道泥
塗多恐更逢豺虎我亦姑且歸婦孺話皇古

次日又出門

禾稻秀門首數見常新鮮田中水色淨池泥同清漣掩
映無雜木叢竹脩且妍有此好隴畝所以依林泉昨日
亭館間苦爲羣芳牽過時百花盡蜂蝶同快然采藥撥
芝草升降崇巖巖何如出門望不待凌陌阡耕耘謝農
夫雨露私自天飽食得嬉游一再詩成篇農圃小人事
聖人勗諸賢四海皆脩民溝壑愁棄捐奈何若牛馬肆
意加笞鞭帝王重本務邦家基萬年

又

青青翡翠羽剌剌起芳甸瑩瑩珠玉光粒粒入嘉饌人

田及我田此際皆可羨我卽無寸土尙欲時相見明農
廿餘載耕鑿夙所戀良苗秀復實稿黃勢盡轉雨後蛙
暄喧風前鳥雀銜謳歌曷能已哺鼓一時徧遠懷陶與
杜詩名出時彥艱難捨橡栗乞食豈珍膳拙言與高歌
慚慙著顏面安坐獲飽煖我輩實懼忤倘逢餓死骨寸
衷何以遣雨暘祈時若饑饉幸無游梁父吟固佳潛夫
論亦善或居隴畝間或上明光殿仁愛同一心窮通兩
不變

魏百齡遺黃楊筆筒

黃楊舊厄閨今閨轉見用好手工量材器成一世重外

方剛其三中虛空於洞有底平如砥粘合妙無縫上下
芝雲垂光景欲飛動山中竭心思草堂承遠送自恨彩
筆充久失謫仙夢眼迷鸚鵡悲淚滴蟾蜍痛未能化長
虹安得吐白鳳勝遺青琅玕斑管百不中惜哉所就小
溝斷固難共若作豆與登直當九重貢祭祀陳法物何
止出銀甕侍臣班揚才拜獻清廟頌敢不藉綺霞汗油
漫戲弄

夜中不寐憶死懷生愴然有述

未百二十年占盡老人態最苦秋夜長一刻夢醒再夢
中見親戚半是死亡輩邱壠何不仁白晝變冥晦石柳

曾有幾穴蟻食人肺卽使偉丈夫常得其警咳歲月亦
虛擲形骸負大塊奈何天地寬鳥蟾空嬗代我輩遺塵
埃詎爲鬼神愛壯盛學周孔思從洛閩逮髦及無一成
屢進輒屢退志氣衰草萊不復夢鼎鼎棲息田園間寒
暑農圃對每懷素心人寤寐關山礙近猶望昆華遠則
海與岱雲烟視離合空中鬱靈壽蕉鹿付真宰生涯究
安在

向來

向來不寐輒吟詩懷古傷今又一時歡會夢驚雲外散
別離淚落雨中悲生涯素髮短難續家計丹砂成最遲

藉米徵孟猶未慣當年杜老竟何爲

歸鳥

雨止秋氣清日落西山岑衆鳥引儔侶奮翮歸其林竹
樹近人屋蛇鼠難相侵一枝夢魂穩天明遺好音老氏
懲辱殆知止聖所欽向晦無所營同有棲息心冠裳趁
星月人且慚微禽求得知何時車馬勞駸駸

次文又賦歸鳥

暮暮深林間歸鳥得所安初到還審顧將宿尙盤桓何
必瓊瑤林鳳雛相追歡分枝願各足同樹常團圓豈不
思高飛清晝倦羽翰稻梁亦有志昏夜羞輕干落月憶

顏色美人在雲端我猶不如爾相思崩肺肝悠悠道里
遠淒淒風雨寒形木心復灰一覺衾枕寬怪哉鴉與狐
出游星月殘

自嘲

拙哉無所能身閒即吟詩精神亦珍惜倦與衾枕期夢
中猶推敲得意燈燼時醒欲書在紙一字不相宜况復
遺忘多心力空費爲勞生是天地大道希與夷仙家有
睡訣曲肱尋吾師

愚哉作詩人名競侯王齊水難斬蛟蛇陸豈割虎犀初
疑末流代乃闢此徑蹊誰知上皇世早已基階梯言志

本性情喜笑哀卽啼時過歸太虛何必鉛槧攜我亦沈
其中發笑汗赫蹏少壯逮衰老鴻爪留雪泥管中只窺
豹天上徒瞻奎幾時空一切不至終身迷

寄孫東注

往日園林樂有餘十年不見竟何如臨風急欲遙相問
對雨翻愁遽得書不哭良朋裁是福能來遠道恐成虛
一聲長嘯誰人應離索傷心豈獨余

閏七夕

深閨兒女憶鍼樓閨歲剛逢七月秋欲向填橋烏鵲問
雙星可復渡河不

聽雨不寐

遠寺疎鐘寂不鳴
荒村誰與報殘更
百年悵悵懷秋意
一夜蕭蕭聽雨聲
韓孟詩多難卒和
關山路遠憚重行
披衣待旦別無事
野老只祈天早晴

竹

樓成纔種竹
竹已與樓齊
根柢延山谷
枝梢出澗溪
清風無日夜
幽徑各東西
長在烟霞裏
門前客自迷
迎送無生客
柴門出亦稀
萬竿難盡畫
一詠輒相依
涼意水千頃
秋聲山四圍
夕林飛倦鳥
同向此間歸

憶君山竹

君山竹繞二妃祠
淚滅瀟湘染徧時
孤棹催歸風雨後
不曾續得楚人辭

折枝亦欲作漁竿
人說魚龍向夜寒
斜抱雲和空對酒
岳陽城下洞庭寬

閏七月十五夜對月

竟分蟾影到西樓
積雨新晴宿霧收
正好滿輪殊別夜
不因閏月已中秋
良朋何處獨難見
老境此時偏易愁
他日相逢詢近作
懷人詩各一囊留

贈李乙觀

籬落蕭疎結古歡
枯松衰柳敞高寒
風流須學柴桑老

送酒王宏不與看

陶句未吟先有騷
小山叢桂尙難招
芙蓉開落秋江上
同抱眞心不寂寥

逝水

逝水流終古
清秋有此身
近年依豫檣
往歲老轅輪
風雨爭長夜
窮愁逼古人
幾時高枕上
夢到武陵春

園菊有華

不離秋水與秋山
中有黃華意更閒
暮雨四圍深竹裏
曉風一樹老松間
吟餘石徑霞初散
夢就茅齋月半灣
若問往來誰是客
蜻蛉飛去蝶飛還

杞露芝雲共百年
凌霜菊蘂亦登筵
極知獨在羣花後
可惜猶開九月前
我以性情分雅俗
人於枝葉較媸妍
早遲多寡何須計
且向斜陽醉晚烟

秋葵

瓜蔓蕭疎豆葉黃
葵花自愛倚斜陽
依依一樹芙蓉老
苦竹叢邊共拒霜

不得出遊

壯歲飽登臨
悠悠遂至今
溪山原不厭
老病特相侵
游借與人足
詩窺賦客心
良朋空憶我
未得卽追尋

芙蓉

言金系附方
玉笙吹送酒杯寬
十二朱樓怯曉寒
開遍芙蓉秋欲暮
美人睡起倦簾看

艷色幽姿兩絕塵
秋光一片落霞勻
閒情願作池塘水
鈿照芙蓉與美人

木芙蓉

晚風吹到木芙蓉
天半朱霞落幾重
仙女不須迎館主
吟詩要上太華峯

菊

飲露餐霞素所諳
桃源柳市界西南
誅茅徑外宅皆雅
鑿井籬邊泉亦甘
僻地人憐無客到
會心時欲與人譚

相思綠玉山房下賓主悠然兩不慚

曉起不愁風露寒料頭跣足輒柏看知君亦愛清狂客
問世誰登大雅壇慣向春花矜彩艷竟同秋草聽凋殘
沉酣却喜傾家釀翻笑沅湘興欲闌

淒淒風雨易黃昏百種繁華一不存自峻丰標成老境
肯低聲價傍人門遲蘭盆秀增吟興與竹同清減淚痕
栩栩莊生餘樂事好尋幽夢到荒園

對菊短歌

風雨無晦明百草受靡爛徒然怨乾坤憂思罕中斷庭
階有菊三兩叢力抵窮愁不扼腕使我忽憶杜陵老臨

風三嗅色枯槁此翁當日能悲歌兼能痛飲傾江河我
今禁詩復禁酒年衰力弱空蹉跎朝看菊花黃暮看菊
花黃春光秋光不相易今人古人遙相望聞道人家亦
有菊赤瑛紫瓊滿華屋短秋不扶塵不揮路遠安能遽
入目人家有菊我不知我家有菊知者誰閒情試向菊
花問幾人相知輒相思相思易以瘦相忘易以肥肥瘦
何足言秋風不我遲

又二絕句

晚遇何崢嶸風霜摧不倒欲采且忍飢留此可娛老
飄飄欲遺世自顧非凡材花開不復落地上多塵埃

長夜

積習原難忘多情亦易移窮愁別無物枕蓆獨於詩與
夢爭長夜催人老一時廿年過不改悔悟悵遲遲

夢董竹溪同數人月下吟詩不與

江月竟成私聯吟我不知悠悠一夜影娓娓數篇詩興
到仙心雜愁來夢境離芙蓉館何在清晝尙相思

雞鳴

燈燼卽黑夜雞鳴漸清曉人鬼分界處中材盡了了如
何陷溺深私欲時相勸我亦苦吟累聲律腎腸繞不知
星月高轉恨乾坤小安得日三丈半夜照浩漭待旦姬

公心千古喻者少

乞菊於李乙觀

八月初九日

秋風無遠近秋色有遲早每於籬菊間吟詩自送老惆
悵尊前英沆碣逐西顥翩翩雙蛺蝶何處枝上抱君家
住句尾落花逕未掃欲往從之遊積雨阻長道殘菊猶
可乞殘客不可惱去年珍重將傲霜異凡草根祗留明
年飢餐得所寶倚徙沆江邊迢迢慰夙好

待菊

出門望不見人夫已多時求菊如求友夕陽江水知

得菊

霜威凜凜隨寒空新得秋花與舊同
笑頰何曾殊氣類
喬松豈復異家風
有人送酒無妨再
自我題詩更不工
此物從來貞晚節
盟心好與幘初終

木瓜

老病從容卧草堂
木瓜摘下久聞香
鍾秋正氣殊桃杏
載地精英耐雪霜
青玉盤陳松葉外
綠銅瓶插菊枝旁
得來本是南華產
蝶夢逍遙晝影涼

乙觀種菊經秋即盛
非不跂蔚亦嫌過早
更擬小
詩寄之

九月霜林落葉多
秋花一種澹如何
若同桃杏爭春雨

聽厭吳姬子夜歌

無數黃花不附春門前車馬尙飛塵
明年試種柳榆樹滿地青錢贈與人

對菊偶詠

忽忽懷千古孤村白日涼山雲來不絕
江水去何長詠菊詩俱澹經秋酒亦香
幾時人與我一笑兩相忘栽花既有土
飲酒豈無杯酒價幾錢值花枝何日開
烟雲嫌雜沓樓閣厭塵埃誰擅風騷譽
遙遙作賦才

詠史

鄴侯作相日求歸自愛蕭然衣白衣
猿鶴終嫌出山早

太公九十隱漁磯

越女負薪遲入宮
浣紗溪上笑春風
黃金星貯長門閉
太息阿嬌恩不終

對菊

吟詩忘醜好不識菊
悲歡鶴淚孤聲遠
松陰瘦影寒一秋
同此境萬古任相看
卷軸縱橫處多人自改觀

月

明月何高高照人不暫捨
婉轉入夢中晶光透屋瓦
象星亦有耀一一守分野
變化我肺腑從容適騷雅
冷然衾枕間魂魄盡瀟灑
天日同拜揚風雨或呵罵
感恩何

以報寸心自藏寫願作雲五色長依彩輪下

愛月無智愚強弱不能假瞻望更二三往往却杯盤天
道有弦望亦復有晝夜幸值良夜中如何及半謝我若
爲明月定自高聲價百求始一見肯聽人取舍飛兔不
可騎虹霓尙可駕苦嫌今夜短好將後夜借兩夜作一
夜清吟莫遽罷多情是明月滄海遠相逐

賦中秋月

月東升日已沒月西落日未出光明徹夜夜無雙又是
中秋歲只一浮雲積雨悉收斂大星小星景盡失如何
精神不飛騰困卧匡牀室如漆若非大愚卽劇疾人生

縱活三百年僅三百回歎清絕安能遂後天地老十二
萬年沁凡骨今夜相對尙微闕明夜陰晴正難必不妨
先賦中秋月

中秋夜

未到中秋日相思旣到中秋夜轉悲老翁不是少年時
天上團圓一輪月人間生死幾別離

月

初昏月未出人心早趨向恨不東南山力爲剗層嶂一
輪旣已高天地盡昭曠空際多白雲將到輒先讓有時
光遙臨如照積雪上萬動寂然靜歡欣難爲狀我獨何

心思未能齊得喪懷生復憶死幽憂若夙釀坐對長太
息起立徒悵望得毋造物心窮愁是嘉貺全怪賀瑰詭
要令嗣絕唱回首少年日興會殊孟浪連夜費嘯歌亦
未臻奇叛再拜謝明月他年更遺餉

月

明月牽愁思亦復引高興大造何其仁今夜又持贈若
與賦光景萬言不能罄笙歌及酒炙雅俗總難稱默然
靜相看內外光遙應癯肥今昨間從知道戰勝

中秋已過許興重九今年菊花開早恐不及待九
日矣漫爲長句

風雨陰晴未可知中秋重九輒吟詩大家幾輩輕相許
先達當年已自癡涼月娟娟沈海水寒飈颯颯破藩籬
商量更叙登高例不采黃花采紫芝

九月山口桃花盛開

清秋自愛野人家日對涼雲雁影斜縱使菊花開欲盡
不曾想到看桃花

西風一夜變東風山口桃花處處紅舊日石樽今尚在
何堪重酌夕陽中

滿城風雨近重陽只此一句奉獻遂成千古登高
故事謝無逸續成三絕句索然興盡矣又續之

何爲也哉

滿城風雨近重陽一句新詩意味長六十三言多事甚
謝郎苦苦續潘郎

滿城風雨近重陽挾此登高便擅場戲馬臺前多少客
幾人纏纏報成章

滿城風雨近重陽九日樽前未易忘與不題糕成故事
續詩今又笑劉郎

畫父銘附

亢者抑之卑者揚之不正者正之欲退者藏之

李卽園病後寄慰

涼風有時至，撼撼驚秋林。老夫夜不寐，愁思難獨任。仰見鴻雁飛，從無孤征禽。銜蘆下青冥，低視千樹林。中澤飲食穩，大阜棲息深。繒繳安所施，唳聲和瑤琴。人生各有適，南北艱追尋。忽聞空中響，有書遺遙岑。壯士拔長劍，欲擊陰山陰。兒女亦悲怨，涕淚流淫淫。大造自鍾毓，么麼私相侵。淹淹困牀第，戀戀懷枕衾。盧扁有妙手，良藥無術葆。盈虛看白月，風雨聽寒砧。斯人得不易，忍使供浮沈。幸爲百鬼捨，餓乏謀釜鬲。書中雖憤發，卒無尤怨心。愧我今安居，但苦霖而霑。兩足力又弱，全籍窮黎黔。鶴控終渺渺，馬行自駸駸。春夏倏已去，晨昏望盍簪。

秋天多星彩，虛爲商與參。秋蟲足蟋蟀，肯逐呻且吟。計程昆華間，與君快登臨。到時如重述，尙恐餘商音。封寄一束紙，落葉悲櫺櫓。

重陽

不謂登高節，翻成閉戶辰。雲山留勝景，風雨限遊人。將相名皆滅，詩文跡亦陳。誰能千載後，歷覽尙如新。詩成天忽霽，徒步我猶能。一采殘黃菊，雙扶短赤藤。不愁隣老境，終惜失良朋。千仞高岡上，無人獨自登。

詣東華山同熙敬五弟

風雨曠登覽，山川怨未漠。及此晴霽時，四顧窮旁礴。幽

境是初歷常畏白日落逢人卽問路懼爲樵牧謔林泉
屢指畫紆曲記邱壑將到已昏黑樹梢辨樓閣

月出蔽高樹清光久始至山僧髮鬢白客來不及避坐
語更旣深弟兄對牀睡僕馬疲且飢得息卽無累遑問
深林中是否有鬼魅犬聲吠不止雞鳴聞爲瑞若無鐘
磬音誰知是山寺

山林有清氣侵晨滿坑谷開門使之入亦復得一屋第
兄皆垂老儘許友麤犢披衣共漱口卽此不空腹況有
石泉水滋液可滲漉所嫌松與桂條幹盡皆禿一洞又
斗絕無由豁雙目邈哉面壁老待尋斷碑讀

天平山墓祭

墓祭得吉日追明敬將事山宿寒氣添恐是風雨至夜
半呼孫語歲月忽遷易邱壠不時省旨如溝壑棄祖宗
猶有知早感霜露異鼎烹未能設盤殮幸可致九折坂
雖峻僕馬罔失墜巖深大霧迷白日光不曬疑惑短晷
影前刻已入地迷人荆棘多歸途輒忘記望見荒村墟
愧心尙發悸迴首思疇昔高堂左右侍

自山中歸昏黑行村前眇畦間艱險幾難爲狀次
日覆覩之無他異也因紀以詩

忽忽已衰老精神異少壯白晝行坦途未敢稍跌跣昏

夜出塋間如何不隘妨西有陷阱阻東有泥水障雙足
穩著地一手緊持杖寸步如苟且性命愁卽喪推挽頓
兒孫燈燭共依傍冷螢人前飛空作小星狀村落笑語
聞知無百步廣大路久裁達險艱永淵上次日重臨觀
阡陌本昭曠始知明暗殊一笑發高唱不是窮聞歷耳
聽必疑妄人生行藏間於此得所向

夜寒

寒天昔無私今於衰老親長夜若更甚四肢僵不伸肢
體我所有役使由一身放縱固滯蕩局促亦苦辛冰凝
石炭火水潑皮褥茵欲得玉爲煖未逮期顛齡回首少

年日笑語聯清屐往往唾隔牀沈吟屢吟呻忽忽遂及
我吁噫天與人半夜不出日三冬那得春負暄望平旦
太陽本深仁

朝暄

每笑紅棉襖諺語空譎人及茲有受用始信天公親富
兒煖閨閣晝夜長如春歌舞消冰雪市買紅炭薪豈知
窮郊廬苦凍安於貧人苦疑是假人樂焉知真獻君得
厚賞聞語顏生嘆老夫北檐下感激私洪鈞舊書挾一
帙肩背烟光新荒園衆禽多亦覺喧呼頻何但犬與雞
歡欣及四鄰無食不悲歎無衣不酸辛鄉村樂莫樂同

作懷葛民

雷雨 十月十五日

十月有迅雷疾雨又何怪雷火不能煖雨水却寒在吟
詩成欲書疑有鬼物害手腕先凍皴繼看筆墨敗南中
固恒燠茅廬薄覆蓋爐火同一擁時時日炙背髭鬚拂
無冰珠玉咳唾快園圃青紅兼草木氣交會似此吁苦
寒琴絃凍折壞雲起蒸爲雨凝卽露雪沛游戲皆龍工
雨雪分殿最何不徑六出皓潔遍中外山林勢一變掩
覆及羣穢我輩縱僵卧有人取作繪

讀卽園與陳雲君唱和曲賦寄

李生知己皆天人，鸞旌鳳蓋交紛綸。水仙早離芙蓉館，
雲中君又驂麒麟。苒蘭城西絕人境，朝烟夕霏變光景。
樓臺移自蓬萊宮，屋宇無多却清整。風流原嘗慚不如，
階盈百屨門連車。名士豪華日對酒，笑人綽約時觀書。
從來家不儲擔石，梟牟更未呼五白。聲譽四海馳文章，
沈謝何劉盡辟易。一家制作千篇多，酬唱復載兼素駝。
忽然厭聽世間語，十洲三島相嘯歌。洲島神仙亦自別，
寂寞喧闐各成列。就中固有磊落才，酷似李生不附熱。
一輪明月抱清秋，飛越海上三層樓。宵涼風寒小閣外，
梧陰竹影同悠悠。是時鶴羣睡正醒，前庭人立聳長脰。

清喚一 一通烟霄餘響猶能律呂金嘉賓賢主思何深
轍軻千古齊傷心半夜天雞自亂叫賦成仰看星斗沈
低回塵世幾永炭一任童兒評月旦擇言開口嗤狂愚
轉是仙人不河漢三百里路飛冥鴻好音遺與衰年翁
有此樓前舊游地今朝正度梅花風曠昔青雲得附早
蓉卿贈有新詩草陳君陳君恐不知沈檀香燼鶴駕杳

寄戴古村

蒼鷹依人飽鸞鳳慎飲啄豚犬不擇地麒麟自有託市
虛朝暮異面背心跡各窮居尙如此旣達將奚若丈夫
固其志身可委溝壑愧我無師資問君究何樂鴻鵠舉

千仞翹首望寥廓

對月

秋月鏡開匳朗朗顏色歡
冬月劍出匣凜凜毛骨寒
志士壯其膽夜半猶倚闌
我固懦夫耳不敢輕相看
遽欲擁衾臥逡巡輪影殘
三升秫釀厚一襲羊裘寬
合拜月與我前後身同觀
感觸中不平髮上衝儒冠
便提古干莫往誅新與瞞
次亦姑小試如曹叔齊桓
歸仍月地坐長缺終宵彈
笑語小兒女休說白玉盤

寒

風雨積寒強作威孤村小屋重掩扉
南方禽鳥凍不慣

未晚盡逐園林歸，迴憶昔年赴塞上。
馬汗成冰，水面相向。若非股慄定，應疑水晶刻畫。
駿骨樣馬，死人敢望生還。天恩許返南雲間，
今朝雖寒，豈至此忍凍休。使增愁顏。石鑪尺焰，
楫樵火酒樽溫。右硯炙左一詩甫成，紅日高。
羲和停輪，舊憐我。

照鏡

神丹舊許駐童顏，自負風流一世間。
明鏡幾曾疲屢照，今朝裁見凍梨斑。

積雨

鄉村石路滑十日，無人至山門試一望。
皂雕濕垂翅，冬。

雨何所爲元冥錯用意陰陽一絀繆兒童詫怪事良弼
入帝夢蒼生命所寄大旱作霖雨安危固各異老夫徒
苦吟語言空擬議旨酒能御冬茫茫付一醉

長夜

長夜聽雞鳴反側不知數兒孫同村居東西各分住平
康尙相思啼笑愛童孺風寒中淺深誰能不往顧念昔
我祖考爲我曾喜懼當日知醫藥百病無一誤刀圭錫
鬢鬢終身得恃怙愧我於和緩未及友平素卽今但省
視愈卽安寢處喔喔聞雞聲起看天未曙

大霧

晨霧徵午晴，騎門快一覽。
混沌未分割，陰陽肆交感。
自是天地功，非關蚩尤敢。
氣雄愁難禦，飲酒壯怯膽。
忽憶江上游，百丈衆夫攬。
笑語來鄰舟，烟重水澹澹。
隱隱吹笛聲，悠揚出葭莢。
湘妃亦竊聽，怡然首微頷。
魚龍擁波浪，勢欲帆檣撼。
揚舲鼓瑤瑟，元音盡平淡。
卽今鄉村中山林，不黯慘。
仙人倘乘龜，介肉亦足噉。
歸休草堂下，日色耀重坎。

卽事

豆綠麥青草，不腐蟄燕坯。
戶蜻蛉舞地，煖少雪舊多。
雨願天賜年，帝賜醕悠悠。
四野聞雷鼓，紛紛朝雨到日晡。

我欲出遊無乾土昨日冬至閉門若今日依舊守環堵

見梅花短歌

雨來懶問庭前路雨止欣然跋履去第一風信是梅花
老樹如約不曾誤慘澹天地忽異色荒寒林泉得佳趣
十日愁霖心如失一冬對雪神若遇忽憶故人贈我鶴
青田仙種古有數家貧已無軒可乘路遠更覺籠難住
雄姿健翮凌烟霄肯爲飲啄溷雞鶩兩年不見倍相思
試作歌招鶴應赴青雲白羽來晴空上乘神入肌膚素
風流絕世舊心交今日共對梅花樹人生樂事誰踰此
月下風前百觴舉迷離仙境或有之此是孤村岑寂處

懷卽園古村

雲霄無雁水無魚獨抱空山一卷書
住白茅菴楓葉下餐紅稻飯菜根餘
已知鬼魅潛藏久終恨風騷會合疏
藉問昆華兩詞客遠峯近浦樂何如

篇終梅已送香風正憶前年雨雪中
日有萬言憑客誦時無一字待人攻
不須善畫成雙絕祇覺能文避兩雄
忍凍孤吟遠相寄幾番開閉恐函空

園中探梅花

一枝高閣對銜杯趨問滿園猶未開
遲速正如名下士後先都向意中來
曉風殘月經心賞落日初霞記手栽

更欲小橋流水畔十年重見影徘徊

山中尋梅花

何至空山少種梅懸崖絕壁負奇材只愁落落無人合
不畏悠悠失路回風定香飛樵逕外月明花覆渡船隈
鄰家約得同心侶雨雪連朝亦去來

虹見

十一月初七日

瓊宮仙女善吹簫遠隔蓬瀛手莫招借得彩虹寒雨後
東南萬里駕長橋

白桃花

白雲遮却遠山尖無限相思一夜添莫向紅霞深處望

玉人只隔水晶簾

漫興

離腦香消水簾斜客來祇說是僧家忽聽壁上雙龍吼
飛向空中落劍花

二詩不知何年所作從舊書本中檢得之蓋學才調
集而僅得其形似者疑是三十年前舊稿也附錄於
此

對梅花作

歲寒思故友小閣有梅花風雪皆詩意溪山幾賦家每
逢閒草木尙憶舊烟霞及此清吟久繁霜兩鬢加

梅花四首

春前老樹若矜奇，一代風騷獨主持。
太息菊衰蘭未秀，海棠開又不同時。

斷橋荒徑跡難通，夢想林家避世風。
欲問當年何客到，開籠放鶴有兒童。

每恨樵蘇雜桂蘭，纔輕颺籬門寒。
清夢若使醒肝膽，正欲疲驢背上看。

枝幹年深中凍梁，作梁何似作龍梁。
漢宮求殿顏垣心，十里桃花笑夕陽。

梅花吟

巖巒積陰氣，谿谷盡深黑。
寒風送白日去，多心惻惻霜。

樹葉凋落赤錦不復飾一夜見梅花深山有顏色昔與
羣木伍衆草競爭殖樵人上嶺頭倚仗斧斤力肩擔入
城市炊爨厭蠻貊時棄亦自矜知己渺難得遭遇如衆
人國士同抑塞烟霧渾不消雪霜轉相逼天地仁愛心
栽培久爲德芬芳匪媚悅蟠屈固勁直幽人逃姓名相
憐始相識紛紛小兒女手扪由耳食我爲梅花計仍往
深山匿危石聳岫嶙嶙凍禽息羽翼下土無人要上天鑒
烟幅朱門牆何高歲久樹荆棘置之貢玉堂忤忤不自
克

夜寒

言金系附卷九
四
夜寒失安寢輾轉聽雞聲雞聲豈能煖四隣無一鳴晝
夜循環至此心空營營不如兩相忘默然全吾生

月下賦梅花

明月照梅花瀟灑誰與倫我欲強比擬惟古飛仙人於
雪識其骨於月遇其神骨已凝鐵石神又絕埃塵野老
遲夜眠亦以影相親心賞手難拾絹素遂見珍雪月不
常有畫圖終就湮宵形好詩句或可留千春苦吟年復
年無一清且新再拜乞明月姑爲停玉輪

暫出山中

野逕徘徊視日車出山長恐少梅花白雲影向小橋盡

橋外時從沽酒家

母親生日

昔年稱壽觴笑對梅花樹
梅花今亦開阿母在何處
畫圖視顏色黯澹不如故
綵衣空侍立蹉跎歲又暮

兩蛺蝶在梅花樹間一黃一白翩翩可愛

春風舞蛺蝶游戲萬花谷
閨閣小兒女紈扇競相撲
霜雪既時至羣生盡瑟縮
顧盼谿谷間翩翩少追逐
野老未晝寢夢魂化何速
有蝶復有我梅花香滿屋
此花秉貞操鶯燕不踟躕
適來得雙雙金玉視碌碌
必是仙人騎留之可信宿
山林際歲暮長與伴馥郁

梅花二首

松杉鱗屈似龍蛇
手拾枯枝夜煮茶
寂寂山村無客到
一庭寒月在梅花

風流何必不孤山
鶴羽蹁跹往復還
吟罷夜深高卧去
詩瓢挂在樹梢間

西鄰看梅花

出門無百步曳杖勝騎驢
香與吾家合枝從此處疏極
難尋付贈久喜擇鄰居
安得風騷輩同來更結廬
有此樓前樹曾經雨雪看
千秋同磊落一夢尙高寒
與汝往來易問誰觴詠
難言今詩卷在檢向醉時觀

梅花

如何千百種祇有此孤芳
年久原同老時寒遂獨香
無人詩易就入夜夢難忘
好作雙飛蝶枝頭共雪霜

夜雨曉看梅花

夜雨愁花落園桃尙早看
與人偕歲暮視汝倍春寒
野館同迴顧鄰家亦往觀
天涯多舊侶惆悵曉雲端

對梅花

不有松兼竹梅花竟獨生
山林原少偶天地自多情
空立影逾澹孤吟香更清
心知笑人世金石易寒盟

題近作梅花詩後

兩宋三唐各一時
睡餘飯罷卽言詩
生愁修到梅花後
竟少人歌絕妙辭

歌詩刪句亦刪章
籬落園林一瓣香
配食水仙真好事
待循修竹問祠堂

折枝

折去欲何爲橫斜此最奇
香猶戀故樹影已讓他枝
想及初栽日心如既落時
灑然無芥蒂只惜不留詩

猗蘭吟

無端作書傭老猶爲人役
白首伏長案短日駒過隙
荷蘭人已至不知遠相逆
尙問從何來拒之如俗客
倦倚

高枕上默然獨自適始見篆香祖竟入野人宅披葉如
劍擁抽莖似玉立七莖十九花瑩瑩色青碧隋珠不暗
投和璧豈輕擲愧讓行路人芬芳先我獲季冬天氣寒
百草空披拾梅花與松竹素心得三益以蘭贈爲四望
影可前席蘭氣游絲細衆翬集塵尺精神未凝一嗅味
終睽隔一室鍵內外重爲國香惜由聞至不聞渾化泯
形迹忽憶陞沈者空谷老泉石人世毀譽多中憂方奕
奕加膝與墜淵誰能供簿責私心願相語各自重圭璧
蘭兮香勿出我兮戶勿闕

隴畔梅花有數鵲鷄游戲其間

隴畔無錢置草堂，扶筇獨立影蒼茫。
鷓鴣亦是同心侶，分與梅花一半香。

門前梅花窠後開

對此興悠然，柴門晚景前。
羣芳聽在後，同類肯爭先。
意若接新歲，情祇依舊年。
不堪人捷足，裘馬競寒烟。

見杏花

一日不開花，天地恨情少。
一日不看花，老人歎年老。
我輩看花知天地，新年未至春先至。
年歲無力春有力，杏花處處有顏色。

見桃花

少春日

定時置閨歲無差每到立春桃有花說與武陵人信否
今年兩度賦紅霞

道光四年歲在甲申余年七十有八矣始知讀杜詩始知學爲詩前乎此固未嘗知爲詩也固未嘗知讀杜詩也杜之於詩其造化之於物乎無物不生無物不變卽一草木觀之根柢枝葉華實色臭無一物之不同者無一物之相似者歷千百年不改其常反之則爲妍改以造也曰化也大矣哉惟杜亦然善讀者逐章句分讀之通全編合讀之而後知杜之不可以一家名也及其爲詩則惟其意之所至而不詭於法惟其理之必是而不泥於迹欲名爲杜而不可欲名爲非杜而不可夫是之謂能讀杜以學爲詩也惜乎余今日而始知之也精神

才力遠遜少壯雖知之庸有濟乎姑以是爲娛老計耳
時賦梅花詩就遂書之於詩鈔續附卷九後
十五日大紳

寄菴詩鈔舊有刻本歸簞後意甚適也因有續詩迫字
憂尙何詩之可言不得已而言故名之曰續附非以見
判詩境之所至也他日當以舊詩鈔爲初集丙寅至壬
申詩爲二集癸酉至辛巳詩爲三集而此壬午癸未甲
申三年詩爲四集略以時地爲次第或亦編詩之例然
其中粗淺率易鄙俗之什甚多待求能詩者盡刪之庶
幾不大貽羞耳同日又書